

贊成李貴忠憤所激不諒此意顯加詆斥勒定罪名不可一日冒居請命罷斥
臣等之職 荅曰今番放釋仁城之教非因仁興之疏而發也且爾等少無所
失勿辭持平金堦俞守曾亦以此引避王堂處置請出○乙亥下教曰明日乃
父母生我劬勞之日也歲律將窮此日又到罔極之懷有倍他日矣明日欲早
往拜哭政院知悉舉行○丙子 上詣魂宮○自初昏至夜一更有霧氣二更
月暈○丁丑 上行仲朔祭○以姜碩期為執義李省身為副校理權濤為修
撰○夜三更坤方有氣如火光電光五更有霧氣○戊寅夜白雲一道如氣起
自西方直指巽方天際長竟天○已卯司藝許福上疏請退練祭政院却之○
庚辰 上幸魂宮行練祭○大臣率百官奉慰 荅曰閭卿等奉慰尤為罔極
○憲府啓曰前察訪康文翼往在戊午廢母后收議之日以天何共戴為辭而
其下四字所不忍書者也措語悖惡莫此為甚而當初論罪之時不但網漏至
於連授職名使罪大惡極之人尚追王法物情憤鬱不可容貸請命按律定罪
諫院亦論之 荅曰獻議之辭若是悖惡則當初必無網漏之理且今始論罪
似為太晚勿煩可也再啓乃命逮竄○辛巳諫院啓曰近來以號牌一事守令
之有罪犯者置而不論以此之故頗有不謹者民間之弊不可不念鳳山郡守